


U ovom broju, između ostalog, čitajte:

- **UPFBiH: Od Uprave BH-Gas očekujemo rješenja za efikasno, kontinuirano, finansijski racionalno snabdijevanje gasom**
- **Wigemark i ambasadori zemalja EU u BiH podržali „Inicijativu 20+5+6“**
- **Ambasador Velike Britanije u BiH podržava nastojanje ZD PFBiH za poboljšanje poslovnog ambijenta**
- **Ministar Drljača pozdravio set zakona koji se odnose na rad i zapošljavanje i "Inicijativu 20+5+6"**
- **Ministarstvo trgovine prihvatilo inicijativu UPFBiH za izmjenu Pravilnika o obliku, sadržaju i načinu vođenja trgovačke knjige**



UPFBiH: Od Uprave BH-Gas očekujemo rješenja za efikasno, kontinuirano, finansijski racionalno snabdijevanje gasom




U Udruženju poslodavaca Federacije Bosne i Hercegovine su neprijatno iznenađeni diletantski intoniranim i vrlo neprofesionalno sročnim saopćenjem iz kompanije BH-Gas u kojemu se umjesto konkretnih obrazloženja javnosti nudi

prazna retorika i demagogija.

Iz UPFBiH ističu da ipak nisu iznenađeni nepoznavanjem osnovnih principa poslovanja od strane generalnog direktora BH-Gasa, koji u saopćenju vrlo otvoreno proziva „stručnjake“ – predstavnike udruženja, institucija i vijeća koji su se javno i argumentirano usprotivili značajnom povećanju cijena gasa.

Iz UFBiH pitaju generalnog direktora BH-Gasa da li je on na ovu poziciju imenovan kao ekspert za oblast energetike, posebno gasa ili na osnovu bogatog menadžerskog iskustva u realnom sektoru ili na osnovu stranačke podobnosti.




Ono što generalni direktor, a ni Uprava BH-Gas, nisu ponudili privredi ali ni javnosti FBiH, a od njih se očekuje, jeste prijedlog strategije i konkretnih rješenja za alternativne izvore za snabdijevanje gasom u BiH.

U svome saopćenju iz BH-Gasa ne odgovaraju ni na pitanje šta su konkretno uradili kako bi BiH bila na nekom novom pravcu snabdijevanja Europe gasom, a u ovome trenutku to nije.

UPFBiH zanima i zašto BH-Gas nije izgradio skladišta za gas, kojima se moglo bitno uticati na cijenu gasa. Od BH-Gasa privreda i građani BiH očekuju i odgovor na pitanje da li se i šta radi na istraživanjima nalazišta plina u BiH. Zdrava logika govori da ako prirodnog gasa ima sa lijeve strane Save, onda bi ga trebalo biti i sa desne strane rijeke Save. Podsjećanja radi, Hrvatska gotovo 40 posto vlastitih potreba za gasom rješava iz domaćih izvora.

Na stranu činjenica da su u BH-Gasu uradili malo i nedovoljno na pokrivanju snabdijevanjem gasom svih kantona u FBiH. Svi znamo za neslavan i neuspjao pokušaj djelomične gasifikacije Srednjobosanskog kantona, koji je predmet brojnih sudskih sporova. Kao i za činjenicu da Tuzlanski kanton ima gasovod, ali nema potrošača.

Javnost u FBiH treba znati i koliko je posrednika u isporuci gasa u FBiH, da li se i na koji način njihov broj (a samim tim i cijena gasa) može smanjiti. Od generalnog direktora i uprave BH-Gas javnost očekuje da ponude konkretne odgovore zbog čega nabavna



cijena gasa u Republici Srpskoj niža nego u FBiH, zašto FBiH ima najvišu nabavnu cijenu gasa u cijelom regionu te kako je moguće da je gas za proizvodne kompanije u FBiH daleko skuplji nego u zemljama EU (u odnosu na Njemačku npr. za 40 posto). Ili zašto u situaciji kada se cijena gasa u Europi smanjuje, imamo na sceni povećanje cijena gasa u FBiH. Kao i prijedlog mjera kako da se u FBiH smanji cijena gasa.

Iz BH-Gasa bi trebali građanima pojasniti da postojeću višu cijenu gasa za privredu, a daleko nižu za građanstvo u FBiH, u konačnici opet plaćaju građani, jer povećanje cijene gasa dovodi do poskupljenja proizvoda i usluga za stanovništvo.

Iz Uprave BH-Gas se ne govori o neustavnoj odluci o taksi-naknadi za izmirenje duga Ruskoj Federaciji. Godinama javnost ne zna šta je sa akumuliranim gubicima BH-gasa po osnovu nenaplativih potraživanja od Glinice Zvornik, a radi se o tolikom iznosu da, ukoliko bi bio naplaćen, u narednih pet do deset godina ne bi bilo potrebe za povećanjem cijene gasa.

Ovo su sve informacije koje bi javnost i građani FBiH trebali znati i očekujemo da, umjesto nesuvislih i bahatih saopćenja, date konkretne odgovore na ova pitanje i rješenja za brojne probleme. Umjesto javnog, neargumentiranog prozivanja bilo koga, iz UPFBiH Upravi BH-Gasa nude da zajednički rade i kreiraju inicijative i prijedloge prema Vladi FBiH i nadležnim institucijama, kako bi se našla i provela rješenja za efikasno, kontinuirano, finansijski racionalno snabdijevanje gasom što većeg broja potrošača na cijelom području FBiH.

Wigemark i ambasadori zemalja EU u BiH podržali „Inicijativu 20+5+6“ Udruženja poslodavaca FBiH za rasterećenje privrede i bolji poslovni ambijent



Predsjednik Udruženja
poslodavaca
Federacije Bosne i
Hercegovine Adnan
Smailbegović i direktor
UPFBiH Mladen
Pandurević održali su
sastanak sa H.E.
Larsom-Gunnarom
Wigemarkom, šefom
Delegacije Evropske

unije i specijalnim predstavnikom Evropske unije u Bosni i Hercegovini i ambasadorima zemalja članica EU akreditiranim u BiH.

Smailbegović i Pandurević su upoznali ambasadora Wigemarka i ambasadore zemalja članica EU sa „Inicijativom 20+5+6“, odnosno, setom pet hitnih izmjena i dopuna zakona te izmjenama i dopunama i prijedlozima novih 20 zakona, kao i šest inicijativa koje je Vladi i Parlamentu FBiH uputilo Udruženje poslodavaca s ciljem rasterećenja privrede i poboljšanja poslovnog ambijenta.

Ambasador Wigemark i ambasadori zemalja članica EU dali su punu podršku ovim reformskim inicijativama UPFBiH koje su ključne za brži i efikasniji ekonomski razvoj BiH.

Također, ambasadori su na sastanku istaknuli da očekuju od predstavnika izvršne i zakonodavne vlasti u Federaciji BiH da daju maksimalan doprinos provedbi reformi i da se u tom procesu rukovode općim i zajedničkim, a ne uskostranačkim, dnevnopolitičkim ili ličnim interesima.

Ambasador Velike Britanije u BiH podržava nastojanje Zastupničkog doma PFBiH za poboljšanje poslovnog ambijenta



Potrebno je promovisati rješenja za unapređenje poslovnog ambijenta u BiH, rečeno je danas na sastanku predsjednika i direktora Udruženja poslodavaca FBiH Adnana Smailbegovića i Mladena Pandurevića sa ambasadorom Velike Britanije u BiH Mattom Fieldom. Sastanku su prisustvovali i direktor Udruženja

poslodavaca Kantona Sarajevo Zlatan Dedić i ekonomski savjetnik Ambasade Velike Britanije Damir Šaljić.

Predstavnici Udruženja su ambasadoru Velike Britanije prezentirali „Inicijativu 20+5+6“ koja ima za cilj rasterećenje privrede i poboljšanje poslovnog ambijenta u FBiH i BiH, a koja je podržana većinom glasova na tematskoj sjednici Zastupničkog doma Federalnog parlamenta održanom sredinom aprila 2019. godine.

Usvajanje „Inicijative 20+5+6“ rezultirat će smanjenjem sive ekonomije i poboljšanjem fiskalne discipline, smanjenjem nezaposlenosti, povećanjem plaća i investicija, podizanjem



konkurentne sposobnosti domaće privrede, pojednostavljenjem i ubrzavanjem administrativnih procedura, kao i smanjenjem troškova poslovanja, kazali su predstavnici Udruženja.

Ambasador Field je ocijenio pozitivnim aktivnosti Udruženja te istakao da podržava nastojanje Zastupničkog doma PFBiH za poboljšanje poslovnog ambijenta. Rečeno je da je potrebno, u cilju općedruštvenog interesa, nastaviti sa reformama, te da je neophodna uključenost svih aktera u ovom procesu, bez obzira na stranačke ili političke interese.

Šef sektora za ekonomska pitanja Američke ambasade podržao inicijativu UPFBiH


Šef sektora za ekonomska pitanja Američke ambasade u BiH John M. Ashworth i ekonomski specijalist Ambasade Amra Džaferović razgovarali su 22. maja 2019. godine sa



rukovodstvom Udruženja poslodavaca FBiH na čelu sa predsjednikom i direktorom Adnanom Smailbegovićem i Mladenom Pandurevićem o inicijativi Udruženja za rasterećenje privrede.

Predstavnici Udruženja naglasili su da će usvajanje inicijative rezultirati poboljšanjem poslovnog ambijenta i rasterećenjem privrede.

Ashwort je pozdravio Inicijativu te naglasio da će Američka ambasada u BiH razmotriti načine pomoći u realizaciji iste.



Ministar Drljača podržao "Inicijativu 20+5+6" i set zakona koji se odnose na rad i zapošljavanje

Ministar rada i socijalne politike FBiH Vesko Drljača sa saradnicima 24. maja 2019. godine primio je delegaciju Udruženja poslodavaca FBiH, a kako bi razgovarali o "Inicijativi 20+5+6". Inicijativa ima za cilj rasterećenje privrede i unapređenje poslovnog ambijenta za općedruštvenu korist.

Prisutni su o setu zakona koji se odnose na rad i zapošljavanje, odnosno o Zakonu o štrajku, Zakonu o mirnom rješavanju sporova, Zakonu o zaštiti na radu, Zakonu o posredovanju u zapošljavanju i socijalnoj sigurnosti nezaposlenih osoba, Zakonu o izmjenama i dopunama Zakona o profesionalnoj rehabilitaciji, osposobljavanju i zapošljavanju osoba sa invaliditetom, Zakonu o ESV-u i Zakonu o reprezentativnosti sindikata i udruženja poslodavaca u FBiH. Usvajanje izmjena i dopuna zakona, kakvo je predložilo Udruženje, rezultirat će unapređenjem rada službi za zapošljavanje i pripremom nezaposlenih osoba za tržište rada, čime će se smanjiti nezaposlenost, unapređenjem zaštite na radu i preventivnom djelovanjem u nastajanju povreda na radu i profesionalnih oboljenja, omogućavanje brzog i efikasnog rješavanja individualnih i kolektivnih radnih sporova, rasterećenjem sudova, većom pravnom sigurnost i boljom primjena zakona u praksi.

Izmjene i dopune ovih zakona, kao i ostalih iz "Inicijative 20+5+6" podržane su većinom glasova na tematskoj sjednici Zastupničkog doma Parlamenta FBiH održanoj sredinom aprila 2019. godine, te su na sastanku dogovorene konkretne aktivnosti za realizaciju zaključaka tematske sjednice.

Ministarstvo trgovine prihvatilo inicijativu UPFBiH za izmjenu Pravilnika o izmjenama i dopunama Pravilnika o obliku, sadržaju i načinu vođenja trgovačke knjige



Direktor Udruženja poslodavaca FBiH Mladen Pandurević razgovarao je sa ministrom trgovine FBiH Zlatanom Vujanovićem o inicijativi za donošenje Pravilnika o izmjenama i dopunama Pravilnika o obliku, sadržaju i načinu vođenja trgovačke

knjige. Sastanku su prisustvovali i pomoćnica ministra za unutrašnju trgovinu i zaštitu potrošača Amra Vučijak, ovlašteni rukovodilac federalnog tržišnog inspektorata Elmir Ramić i pravnica UPFBiH Jasmina Kurspahić.

Naime, prema Pravilniku postoji obaveza ovjere potpisom i pečatom tačnosti izrađene kalkulacije cijena koja se sastavlja za svaku nabavljenu robu. Istim Pravilnikom data je mogućnost vođenja trgovačke knjige elektronskim putem, a izmjenama i dopunama Pravilnika iz 2017. godine propisana je obaveza štampanja podataka iz knjige koja se vodi elektronski samo prilikom inspeksijske kontrole na zahtjev inspektora.

Obzirom da je Pravilnikom data mogućnost vođenja trgovačke knjige elektronskim

putem i štampanja podataka samo na zahtjev inspektora Udruženje poslodavaca FBiH smatra da bi trebalo omogućiti i štampanje kalkulacija samo na zahtjev nadležne inspekcije (ukoliko trgovac ima mogućnost elektronske izrade, evidencije i pohrane kalkulacija). Cilj predložene izmjene je ušteda troškova štampanja i ovjeravanja, ušteda papira, te ušteda prostora za arhiviranje kao i smanjenje administrativno tehničkih poslova.

Ministar i ostali prisutni su ocijenili da je inicijativa Udruženja opravdana, te da će Ministarstvo što prije pristupiti izmjenama pomenutog Pravilnika.

Potrebno je da vlasti u BiH daju apsolutni prioritet rješavanju nagomilanih problema u društvu i ekonomiji



Udruženje poslodavaca FBiH u saradnji sa Dnevnom listom organizirao je 14. maja u Sarajevu promociju Projekta „Moj proizvod“.

Projekat „MOJ PROIZVOD“ je pokrenut 2015. godine kako bi se šira javnost upoznala s

preduzećima koja svojim radom i djelovanjem zauzimaju istaknuto mjesto u stvaranju sigurnog i stabilnog privrednog okruženja te uz svoj ogromni rad i zalaganje pridonose

napretku Bosne i Hercegovine. Takođe, ovaj projekat ima za cilj promociju i jačanje bh. kompanija, te stvaranja pozitivnog mišljenja građana o privredi naše zemlje. Dnevni list i Udruženje poslodavaca FBiH su kroz Projekat čitateljsku javnost upoznao sa više od 250 domaćih preduzeća čiji proizvodi su reprezent privrednog sektora BiH, ne samo u regiji, već i u svijetu.


"Bez privrede se ne može razvijati ni država ni društvo, a istovremeno su privrednici ti koji su često marginalizirani u društvu. Upravo kroz ovaj projekat želimo ukazati na važnost privrednika za razvoj države i društva" istakla je voditeljica Projekta Selma Dandić.



U okviru promocije održana je panel diskusija „Kuda ide privredni sektor BiH? Problemi i rješenja" na kojoj su učestvovali federalni ministar razvoja, poduzetništva i obrta Amir Zukić, predsjednik Udruženja poslodavaca FBiH Adnan Smailbegović,

potpredsjednik Vanjskotrgovinske komore BiH Ahmet Egrić i predsjednik Udruženja poslodavaca KS Safudin Čengiđ.

Cilj panela je bio definisati najveći problemi koji sprečavaju napredak i poboljšanje



privrede u FBiH, te pokušati ponuditi konkretna rješenja.

"Udruženje poslodavaca FBiH je pripremlilo 'Inicijativu 20+5+' koja ima za cilj rasterećenje privrede i poboljšanje poslovnog ambijenta u FBiH i BiH, a koja je podržana većinom glasova na tematskoj sjednici Zastupničkog doma Federalnog parlamenta održanom sredinom aprila 2019. godine. Mišljenja smo da poslodavci trebaju biti uključeni u izradu zakonskih propisa", kazao je Smailbegović.

Učesnici panela istakli su da je inicijativa Udruženja poslodavaca FBiH konkretan dokaz kolika je ambicija poslodavaca da se aktuelna situacija u BiH promijeni.

„Pomenuta inicijativa će znatno doprinijeti kvalitetnijem i boljem radu poslodavaca, ali i cjelokupnom ekonomskom razvoju zemlje", istakao je Čengić.

Učesnici su razgovarali o problemima i preprekama koji ograničavaju rast i razvoj privrede, te o inicijativama i aktivnostima koje se provode u svrhu ekonomskih reformi.

„Potrebno je poboljšati regulatorne okvire te je ovo Ministarstvo pripremlilo nove tekstove Zakona o obrtu, Zakona o poticaju razvoja male privrede i Zakon o unapređenju poduzetničke infrastrukture. Ti zakoni imaju za cilj podršku malim i srednjim preduzećima, posebno start-upovima, i kreiranju poduzetničkih zone. Vlada FBiH je za ove namjene izdvojila oko osam miliona KM.", kazao je ministar Zukić.

Sastanak sa Klubom SBB-a u Zastupničkom domu PFBiH o "Inicijativi 20+5+6"

Predsjednik i direktor Udruženja poslodavaca FBiH Adnan Smailbegović i Mladen Pandurević održali su 14. maja 2019. godine sastanak sa Klubom zastupnika Saveza za bolju budućnost u Zastupničkom domu Parlamenta FBiH, a



kako bi razgovarali o inicijativi Udruženja poslodavaca FBiH za poboljšanje poslovnog ambijentana.

Zastupnici su pohvalili i prihvatili "Inicijativu 20+5+6" koju su detaljno analizirali, te se zahvalili Udruženju što je preuzelo proaktivnu ulogu u kreiranju mjera za rasterećenje privrede.

Na konstruktivnom sastanku posebna pažnja posvećena je tekstovima Zakona o izmjenama i dopunama Zakona o zdravstvenom osiguranju, Zakona o doprinosima, Zakona o porezu na dohodak i Zakona o izmjenama i dopunama Zakona o porezu na dobit. Udruženje će primjedbe i sugestije zastupnika SBB-a na pomenute zakone razmotriti u cilju formiranja što kvalitetnijih tekstova zakona.

UPFBiH i UGP zajedničkim aktivnostima do boljih uvjeta za poslovanje




U prostorijama Udruge gospodarstvenika Posušje (UGP) održan je 22. maja 2019. godine sastanak predstavnika UGP-a i Udruženja poslodavaca FBiH. UGP su predstavljali predsjednik Ivan

Pavković i sekretar Stjepan Bago, a UPFBiH direktor Mladen Pandurević i pravnica Jasmina Kurspahić.

Tema sastanka bila je Inicijativa UPFBiH o izmjenama i dopunama zakona i pravilnika čije usvajanje bi rezultiralo rasterećenjem privrede i stvaranjem povoljnijeg poslovnog okruženja u BiH. Navedena Inicijativa je prihvaćena od strane Zastupničkog doma Parlamenta FBiH na tematskoj sjednici održanoj početkom aprila u Sarajevu i upućena je Vladi FBiH na očitovanje i dostavu Parlamentu na usvajanje u roku od 60 dana.

Predstavnici UGP-a su dali podršku Udruženju poslodavca FBiH i njihovim inicijativama za konkretnim izmjenama i dopunama zakona.



Na sastanku se razgovaralo i o daljnjim zajedničkim aktivnostima po pitanju Inicijative, kao i o mogućnostima organizacijske povezanosti ovim dviju srodnih udruženja, a sve u cilju zajedničkih aktivnosti po pitanju stvaranja povoljnih uvjeta za poslovanje u BiH.


Rasterećenje privrede i povoljniji uvjeti poslovanja nam je zajednički cilj, a do njega možemo doći samo zajedničkim i konkretnim prijedlozima i aktivnostima koje ćemo poduzimati prema tijelima javne uprave na svim razinama u ovoj državi, zaključak je ovog sastanka.

Sastanak sa predstavnicima kompanija sa područja Hercegovine o "Inicijativi 20+5+6"

Predsjednik Udruženja poslodavaca FBiH Adnan Smailbegović i član Upravnog odbora UPFBiH Snježana Kopruner održali su 07. maja 2019. godine u prostorijama kompanije Violeta u Grudama sastanak sa predstavnicima velikih i uglednih kompanija sa područja Hercegovine.

Sastanku su prisustvovali predstavnici kompanija Grafotisak, Meggle, Feal, Ataco, Planet, Lumen, Franck, M.C.I. i Suton.

Na sastanku se razgovaralo o Inicijativi Udruženja poslodavaca FBiH koja će doprinjeti rasterećenju privrede, smanjenju sive ekonomije i poboljšanju fiskalne discipline, smanjenju nezaposlenosti, povećanju plaća i investicija, podizanju konkurentske sposobnosti domaće privrede, pojednostavljenju i ubrzavanju administrativnih procedura, kao i smanjenju troškova poslovanja.



Radi se o prijedlozima 25 zakonskih rješenja i šest inicijativa koji su podržane većinom glasova na tematskoj sjednici Zastupničkog doma Federalnog parlamenta koja je održana početkom aprila 2019. godine.

Predstavnici kompanija su podržali aktivnosti Udruženja kao i samu inicijativu, te je naglašeno da će članice Udruženja nastaviti lobiranje kod vlasti za ustvajanje inicijative.

UPFBiH i Asocijacija poduzetnika Hercegovine o rasterećenju privrede

Direktor Udruženja poslodavaca FBiH Mladen Pandurević razgovarao je sa rukovodstvom Asocijacije poduzetnika Hercegovine o „Inicijativi 20+5+6" koja će dovesti do poboljšanja poslovnog ambijenta.

Istaknuto je da se privrednici iz svih dijelova Bosne i Hercegovine susreću sa istim ili sličnim problemima, te da će inicijativa Udruženja poslodavaca FBiH unaprijediti poslovanje, povećati zaposlenost, pojednostaviti administrativne procedure, a sve u cilju razvijanja domaće ekonomije.

Predstavnici Asocijacije pozdravili su Inicijativu te dogovorili dalje zajedničke aktivnosti s ciljem rasterećenja privrede.

Također, na sastanku je razgovarano o pristupanju Asocijacije poduzetnika Hercegovine Udruženju poslodavaca FBiH.

UPFBiH i Elektroprivreda BiH održali pripremni sastanak za učešće u javnoj raspravi



U vezi sa Revidiranim nacrtom odluke o izmjenama i dopunama Općih uvjeta za isporuku električne energije i Nacrtom pravilnika o izmjenama i dopunama Pravilnika o opskrbi kvalificiranih kupaca

električnom energijom i postupku promjene opskrbljivača, a koji će biti predmet javne rasprave koja se održava 23. maja 2019. godine u prostorijama FERK-a, direktor Udruženja poslodavaca FBiH Mladen Pandurević i izvršni direktor za snabdijevanje i trgovinu Elektroprivrede BiH Džemo Borovina održali su sastanak. Sastanku su prisustvovali i Jasmina Džaferović i Melih Džizić iz Sektora za snabdijevanje, kao i pravnica Udruženja poslodavaca FBiH Jasmina Kurspahić.

Udruženje poslodavaca FBiH će na pomenute akte dati primjedbe i prijedloge u predviđenom roku.

UPFBiH na javnoj raspravi o električnoj energiji



Na javnoj raspravi Regulatorne komisije za energiju u FBiH (FERK) o Revidiranom nacrtu odluke o izmjenama i dopunama Općih uvjeta za isporuku električne energije i Nacrtu pravilnika o izmjenama i dopunama Pravilnika o opskrbi kvalificiranih

kupaca električnom energijom i postupku promjene opskrbljivača učestvovali su i predstavnici Udruženja poslodavaca FBiH, odnosno direktor Mladen Pandurević i pravnica Jasmina Kurspahić.

Naime, FERK je u januaru ove godine usvojio Nacrt odluke o izmjenama i dopunama Općih uvjeta za isporuku električne energije, a o njemu je održana i opća rasprava. Razmatrajući tada zaprimljene komentare zainteresirane javnosti, FERK je ocijenio kako je potrebno neke odredbe suštinski izmijeniti, odnosno dopuniti, te je pripremio Revidirani nacrt.

Na pomenutoj sjednici usvojen je i Nacrt pravilnika o izmjenama i dopunama Pravilnika

o opskrbi kvalificiranih kupaca električnom energijom i postupku promjene opskrbljivača u cilju preciznije i lakše primjene pojedinih odredbi Pravilnika od svih sudionika u energetske sektoru. Radi se, između ostalog, o izmijeni i dopuni pojedinih odredbi pravilnika vezanih za zaključivanje ugovora o korištenju distribucijske mreže i ugovora o opskrbi električnom energijom i načina plaćanja preuzetih obveza po istim.

Javna rasprava održana je 23. maja 2019. godine, a Udruženje će svoje primjedbe dostaviti u predviđenom roku, odnosno do 28. maja 2019. godine.

Zakonom definisati mogućnost ustapanja radnika

U prostorijama Udruženja poslodavaca FBiH održan je 22. maja 2019. godine sastanak predstavnika firmi Prevent grupacije, Holdine i Agencije za posredovanje u zapošljavanju, a kako bi razgovarali o problemu sa kojim se poslodavci susreću u vezi sa ustupanjem radnika na nivou grupacije kompanije. Sastanak je vodila sekretar UPFBiH Mersiha Jusić.

Naime, Zakon o radu FBiH iz 2016. godine ne definira institut privremenog zapošljavanja, niti čak i ustupanje radnika. Izmjene predmetnog Zakona iz decembra 2018. godine također nisu donijele pomak u ovom pogledu. Zakon o radu definira pojam poslodavca i radnika, što predstavlja osnov sudskim organim u odlučivanju o prekršajnoj odgovornosti subjekta koji posluju na principu privremenog zapošljavanja.

Društva koja vrše ove usluge su ograničena u pružanju usluga privremenog zapošljavanja, dok su poslodavci uskraćeni za korištenje ove usluge. U skladu sa Članom 7. Zakona o radu,



poslodavac je slobodan organizovati rad na način koji on smatra da je optimalan i isto predstavlja autonomno pravo poslodavaca.

Također, radnici ostaju uskraćeni za mogućnost zaposlenja obzirom da se efektivno uskraćuje otvaranje novih radnih mjesta. Nedostatak pravne regulacije ne može predstavljati razlog za uskraćivanje poslovanja koje može dovesti do povećanja radnih mjesta.

Radna grupa je zaključila da je potrebno ovu materiju definisati posebnim zakonom.


Donošenjem pomenutog zakona bi se nakon višegodišnjeg pravnog vakuuma uredilo pitanje rada preko agencija za privremeno zapošljavanje, odnosno ustupanje zaposlenih. Utvrdio bi se okvir za funkcionisanje tržišta u ovoj djelatnosti i zaštitu osnovnih prava ustupljenih radnika. Zakon o radu poznaje samo ugovorni odnos između zaposlenog i poslodavca, tako da ne uređuje rad zaposlenog preko agencija za privremeno zapošljavanje. Jasnim definisanjem agencija za privremeno zapošljavanje i

preciziranjem uslova za njihov rad, pravima i obavezama lica koji sa agencijom za privremeno zapošljavanje zaključuju ugovor o radu radi ustupanja na privremeni rad poslodavcu korisniku i druga međusobna prava i obaveze zaposlenih, agencije i poslodavca korisnika, uredit će se ova oblast i maksimalno zaštititi tzv. agencijski zaposleni. Tim radnicima obezbjedit će se jednaka zarada i drugi osnovni uslovi rada (radno vreme, odsustva, odmori), bezbjednost i zdravlje na radu i drugi uslovi rada koji se primenjuju na zaposlene koje neposredno zapošljava poslodavac-korisnik (po čijem nalogu i uputstvima agencijski zaposleni rade). Usvajanje ovakvog zakona bi imalo za cilj i podsticanje zapošljavanja i razvoj fleksibilnih oblika radnog angažovanja uz stvaranje preduslova da u tim slučajevima neće dolaziti do smanjivanja prava radnika i iskorištavanja njihovog položaja.

ESV KS će zatražiti povlačenje odluke o poskupljenju plina



Novo povećanje cijene plina uticat će na sve segmente društva, na poslodavce, ali i na građane zbog čega će predstavnici Kantona Sarajevo zatražiti povlačenje ove odluke, rečeno je to na sjednici Ekonomsko-socijalnog vijeća za područje ovog kantona, održanoj 15. maja 2019. godine.



Kako je istaknuto, brojni poslovni subjekti cjelokupnu proizvodnju baziraju na korištenju alternativnog energenta odnosno plina zbog čega je neminovno da dođe do povećanja cijena proizvoda ukoliko se uskoro ne iznađe adekvatno rješenje.

Premijer Kantona Edin Forto pojasnio je da je već zatražen sastanak s resornim federalnim ministrom kako bi se razgovaralo o stvarnim razlozima poskupljenja te kakve su daljnje projekcije prema kojima će se Vlada KS odrediti.

Kantonalni ministar rada i socijalne politike Malik Garibija naglasio je da je ta odluka i socijalni pritisak posebno na osobe slabijeg imovinskog statusa i to ne samo kada je u pitanju direktno poskupljenje plina nego i zbog posrednog poskupljenja ostalih artikala.

Član Ekonomsko-socijalnog vijeća u ime Udruženja poslodavaca KS Safudin Čengić napomenuo je da je ovo još jedan udar na privredu, te umjesto deklarativnih obećanja za rasterećenje privrede svakog dana uvode se novi nameti.

– Povećati cijenu plina u vrijeme kada je to jedini energent čije cijene na svjetskom tržištu stagniraju ili padaju, je dokaz da neko povlači poteze koji nisu u interesu poslodavaca u Federaciji Bosne i Hercegovine – dodao je Čengić.

Članovi Ekonomsko-socijalnog vijeća izrazili su nadu da će Federalna vlada povući odluku o poskupljenju cijene plina ili iznaći rješenje za participaciju troškova koji će nastati.

Održana X sjednica UO Udruženja poslodavaca KS



Deseta sjednica Upravnog odbora Udruženja poslodavaca Kantona Sarajevo održana je 22. maja 2019. odine. Na sjednici su, izuzev članova UO, prisustvovali predsjednik i potpredsjednica Skupštine UO Nijaz Skenderagić i Amela Hrbat, predsjednik Udruženja poslodavaca FBiH

Adnan Smailbegović i direktor Srednje škole metalnih zanimanja Elmedin Lukač.

Na sjednici su članovi UO razgovarali o Sajmu srednjih škola koji će se održati 27. maja 2019. godine ispred centra BBI. Ministarstvo za obrazovanje, nauku i mlade KS uputilo je molbu Udruženju poslodavaca KS da pozove poslodavce da učestvuju na Sajmu. Također, Ministarstvo je uputilo molbu za dostavljanje podataka sa kojima raspolaže UPKS a koji se odnose na deficitarna zanimanja sa srednjom stručnom spremom, kako bi se na adekvatan način moglo planirati upis učenika u prvi razred srednjih škola u školskoj 2019/2020 godini. Udruženje poslodavaca KS uputiti će poziv poslodavcima za učestvovanje na Sajmu i na osnovu anketiranja članica napraviti će analizu deficitarnih zanimanja i istu dostaviti Ministarstvu. Zaključeno je da će se tokom jula organizovati tematska sjednica UO UPKS I Ministarstvo za obrazovanje, nauku i mlade KS a kako bi se razgovaralo o problemima u obrazovanju i pokušali pronaći zajednička rješenja.

Direktor Udruženja poslodavaca KS Zlatan Dedić informisao je prisutne o ishodu drugog sastanka Koordinacionog tijela za parafiskalne namete Kantona Sarajevo na kojem je razgovarano o dvije inicijative Udruženja poslodavaca KS, odnosno o inicijativi za donošenje Zakona o izmjenama i dopunama Zakona o šumama KS i inicijativi za donošenje Zakona o izmjenama i dopunama Zakona o turizmu KS. Zaključeno je da će članice UPKS, odnosno poslodavci iz različitih djelatnosti dostaviti Stručnoj službi Udruženja primjedbe i sugestije na parafisklane namete iz tih oblasti poslovanja, a koji će biti predmetom rasprave na idućem sastanku Koordinacionog tijela.


U nastavku sjednice usvojene su informacije o održanoj tematskoj sjednici Vlade KS i Udruženja poslodavaca Kantona Sarajevo, informacija o održanoj tematskoj sjednici Zastupničkog doma Parlamenta FBiH o "Inicijativi 20+5+6", informacija o zaključcima ESV-a KS u vezi povećanja cijena gasa.

Smanjiti naknade za općekorisne funkcije šuma



Na drugom sastanku Koordinacionog tijela za parafiskalne namete KS razgovarano je o dvije inicijative Udruženja poslodavaca KS, odnosno o inicijativi za donošenje Zakona o izmjenama i dopunama Zakona o šumama

KS i inicijativi za donošenje Zakona o izmjenama i dopunama Zakona o turizmu KS.



Sastanak je održan u Ministarstvu finansija KS 20. maja 2019. godine, a izuzev članova Kooridnacionog tijela, sastanku su prisustvovali i predstavnici Uprave za šumarstvo KS, te Zlatan Dedić i Jasmina Kurspahić ispred Udruženja poslodavaca KS. Predstavnici Turističke zajednice Kantona Sarajevo se nisu odazvali pozivu niti su se izjasnili o predloženim inicijativama.

Diskusije su išle u pravcu smanjenja naknade za općekorisne funkcije šuma po postojećem modelu dok se rasprava se o izmjenama i dopunama Zakona o turizmu odgodila za sljedeći sastanak radi pripreme dodatnih informacija.

Održana prva sjednica ESV-a ZDK nakon imenovanja nove kantonalne vlade

Novi premijer Zeničko-dobojskog kantona Mirza Ganić izabran je za predsjednika Ekonomsko-socijalnog vijeća za područje Zeničko-dobojskog kantona. Bila je ovo i prva sjednica ESV ZDK nakon imenovanja nove kantonalne vlade.

- Jedan od socijalnih partnera se promijenio pa je ovo bila i konstituirajuća sjednica. Dogovorili smo se da novi predsjedavajući bude premijer Ganić, jer je i u starom sazivu predsjedavajući bio bivši premijer Miralem Galijašević - kazao je predsjednik Upravnog odbora Grupacije poslodavaca ZDK Kasim Kotorić.

Napominje kako će se svakih šest mjeseci rotirati na čelu ESV predstavnik Vlade, Sindikata i Grupacije poslodavaca ZDK.




- Formalno-pravno, nije ni bitno ko će biti prvi predsjedavajući. Bitno je da mi zadržimo kontinuitet uspješnog rada, da što više inicijativa koje se podnose, prije kreiranja zakonskih akata, budu puštene u skupštinsku proceduru. Sada ćemo imati više vremena da

utičemo i na same izmjene te donošenje novih zakona, djelovanjem u njihovoj početnoj fazi - kazao je Kotorić, koji je istakao kako su u prethodnom sazivu imali uspješnu saradnju s Vladom ZDK, o čemu svjedoči i 12 održanih sjednica.

- Očekujemo da će i u budućnosti ova Vlada prepoznati ulogu i funkciju ESV te da će, kroz proaktivnu raspravu, koristiti njegovu poziciju i na taj način ostavirati pozitivnije i kvalitetnije svoju ulogu - kazao je predsjednik Saveza samostalnih sindikata ZDK Mirnes Isaković, koji je napomenuo kako je ESV ZDK i najuspješnije takvo tijelo.

- Težište današnje sjednice bilo je na Uredbi, koja se odnosi na zapošljavanje u javnom sektoru u ZDK-u. Razmatrana je i inicijativa koja se odnosi na usvajanje Prostornog plana Grada Zenice. Dogovoreno je da se inicijativa uputi resornom ministarstvu i Vladi, da bi u što kraćem roku bio i usvojen na Skupštini ZDK - najavio je Ganić.

On je dodao kako će svi zajedno apelirati za zastupnike da ga i usvoje, čime bi bili oblokirani projekti iz oblasti gradnje na području Grada Zenica.




Objavljeni javni pozivi za subvencije preduzećima za uvezivanje radnog staža

Vlada FBiH je usvojila dva programa utroška sredstava utvrđenih ovogodišnjim Budžetom FBiH Federalnom ministarstvu energije, rudarstva i industrije, a namijenjenih kao subvencije preduzećima za uvezivanje radnog staža radnicima koji su stekli uslove za penzionisanje, ali im nisu uplaćeni doprinosi za PIO. Prvi program vrijedan 1.000.000 KM, odnosi se na subvencije privatnim preduzećima i poduzetnicima.

Grant sredstva će biti dodjeljivana preduzećima iz oblasti metalne, elektro automobilske, drvne, papirne i grafičke, zatim industrije građevinskog materijala, proizvodnje tekstila, kože i obuće, kao i hemijske i industrije gume i plastike. Pravo na dodjelu sredstava privatna preduzeća mogu ostvariti samo po jednom podnesenom zahtjevu, a maksimalan iznos koji može biti dodijeljen jednom privrednom društvu je 200.000 KM.

Usvojen je i Program subvencija javnim preduzećima za uvezivanje radnog staža u iznosu od 9.000.000 KM. Program se odnosi na preduzeća u kojima Federacija BiH ima udio u vlasništvu od najmanje 50 posto plus jedna dionica, računajući i preduzeća u poteškoćama ili u stečaju. Pri izboru korisnika sredstava, ukoliko ne bude dovoljno sredstava, kriteriji će biti broj zaposlenih koji će biti penzionisani, te ravnomjerna teritorijalna zastupljenost.

Javne pozive i programe potražite na [linku](#).



Javni poziv za kandidovanje Programa utroška sredstava Trajnog revolving fonda kod Union banke d.d. Sarajevo, FMERI za dugoročno finansiranje projekata putem dodjele kredita za 2019. godinu

Federalno ministarstvo energije, rudarstva i industrije objavilo je javni poziv za kandidovanje projekata koji će se finansirati kreditom iz Trajnog revolving fonda kod Union banke. Pravo učešća imaju privredna društva sa sjedištem u Federaciji BiH čija je primarna djelatnost metalna, elektro i automobilska industrija, industrija građevinskog materijala i nemetala, drvna, papirna i grafička industrija, proizvodnja tekstila, odjeće, kože i obuće i hemijska, farmaceutska industrija i industrija gume i plastike, te da zapošljavaju najmanje 15 zaposlenika.

Javni poziv i Program možete preuzeti na [linku](#).

Općina Kakanj putem licitacije prodaje poslovne prostore

Putem licitacije, u Kakanju se prodaju poslovni prostori u vlasništvu Općine Kakanj.

Predmet prodaje su poslovni prostori u ulici Osmana Džafića, Melente Bošnjaka, Alije Izetbegovića i Ulici branilaca.

Ponuđači mogu biti sve fizičke i pravne osobe, u slučaju da je ponuđač pravno lice (d.o.o.,

PONOVNI JAVNI KONKURS

o prodaji poslovnih prostora u
vlasništvu Općine Kakanj
putem licitacije

PRODAJA PROSTORA

k.č.br.1369/22 EZIUJ57
Administrativno poslovna zgrada
Ulica branilaca br. 1, KAKANJ

Površina: 90 m²

Cijena : 1.440 KM / m²
Početna cijena

Kontakt informacije

032 771-831 lokal 893



www.kakanj.gov.ba/prodaja-prostora

d.d., d.n.o. i
slično) njihov
predstavnik je
dužan na
prednje
navedeni
datum i satnicu
provođenja
licitacije

ponijeti, predati i/ili na uvid dati Komisiji za javnu prodaju općine Kakanj potrebnu dokumentaciju.

Krajnji rok za prijem prijava je 31.05.2019.godine do 15:30 sati (bez obzira na način dostavljanja – lično ili poštom). Sve ponude koje pristignu poslije ovog roka neće se zaprimati niti uzimati u razmatranje.

Postupak javnog nadmetanja – licitacije provest će se 03.06.2019. godine u 11.00 sati u zgradi Općine Kakanj, ulica Branilaca br. 1., Kakanj, treći sprat sala br.3.1. uz prisustvo ponuđača prilikom provođenja postupka licitacije.

Javni konkurs pogledajte [OVDJE](#).



UDRUŽENJE POSLODAVACA

UDRUŽENJE POSLODAVACA FBiH

MULA MUSTAFE BAŠESKIJE 12/3, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba